

CHICHOIS VO LOU NERVI DE MOUSSU LONG

G. BÉNÉDIT A BARTHÉLEMY.

Lou vinto-cinq doou mes darrier,
T'escriveri per lou courrier,
Et ti doneri à la filo
Leis agramens de nouestro villo,
Ti parléri d'abord doou Cous,
Fres en estiou, quoiqué poussous,
Car despui qu'an fa plaço netto,
Touei lei rabeïroous doou cantoun,
Per espragna lou boues et lou carboun,
Oou souluou couignoun d'oumeletto,
Prochi d'aquel oustaou à façade de gi,
Mounte vias: ICI L'ON CERCI!
T'ai parla de la fouen de la place Royalo
Aquelou puissanto rivalo
De Louei l'arrousaïre publi,
T'ai parfetamen establi
Lei parfums savourous qu'incessamment exalo
La barriquo municipalo,
Et lei douis rangs de pissadou
Que soun lou long deï courradous.
Ai pa' oublida lou port à l'oudour embaïmado
Que toumbo nuech et jour lei mousco'à la voulado
Et lou plaisi toujours pu noou
De proumena en bateou din la villo quand ploou.
Maï tout aco es pas ren, ami, car ai en testo
Encaro un inciden per accompli la festo:
L'enfant quand si va counfessa
Gardo toujours lou gros pecca
Per la fin; ensin iou; vas veïre,
Que ti menti pas, va poues creïre,
Quant oou sujet que voou trata,
Duou piqua ta curiosita;
Car enfin va soouras, ooujourd'hui mi rèservi,
Barthelemy, de ti parla deï nervi,
Et surtout doou nervi Chichoï,
Cita per seï nombrous exploits.